

# Far punts tranter scola e cultura

La Magistraglia grischuna prenda posiziun tar il sboz da la nova lescha davart la promoziun da la cultura

■ (mc) **La Magistraglia grischuna, l'uniun tetgala da las scolastas e dals scolasts dal Grischun, sustegn las intenziuns da la revisiun da la lescha davart la promoziun da la cultura. En il rom da la procedura da consultaziun accentuescha la Magistraglia grischuna la necessitad d'ina buna cooperaziun tranter scolaziun e cultura.**

La presidenta *Sandra Locher Benguerel* accentuescha en sia posiziun la rolla da la cultura sco part impurtanta ed integrala en il rom da la furmaziun integrala da l'uffant. Quei postuleschia dal reminent era l'emprim artigel da la lescha da scola chantunala. La furmaziun culturala dals uffants e giuvenils contribueschia essenzialmain al svilup da la personalitad. Ella lubeschia da s'occupar cun l'atgna personalitad e cun las atgnas valurs. Ella inspireschia la creatividad, promovia ils talents artistic e lubeschia da vesair perspectives inusitadas. E betg l'ultim rinforzia il discurs cuminaivel cun la cultura la coesiun sociala entaifer ina classa, stgaffind lioms restants.

Tenor l'avis da la Magistraglia grischuna sa paja l'activitad culturala dals uffants dublamain. Dad ina vart presta ella ina preziosa contribuziun a la furmaziun dals giuvenils, da l'autra vart avra ella portas per arranschaments culturals che levgieschan sco carschè era l'access ad autras instituziuns culturalas e politicas.

## Promoziun da scola e cultura

La Magistraglia grischuna sa bun grà a l'Uffizi da cultura dal Grischun che ha stgaffi 2013 in impurtant instrument per sustegnair la cultura en las scolas grischunas. Quai faciliteschia a las scolas l'access a la cultura e las scolas fetschian gugent adiever da questa purschida. Ins haja dentant constatà che quests instruments da promoziun na sajan betg enconuschents dapertut tuttina bain. Quai haja

motivà la Magistraglia grischuna da tematisar questa purschida en l'ediziun d'october dal Fegl scolastic. L'instrument existent basegna dentant tuttavia ina cumplettaziun.

## Propostas da la magistraglia

La Magistraglia grischuna vulesc cumplettar l'artigel 1 davart la finamira a moda suandanta: «La promoziun da cultura ha la finamira da promover las activitads culturalas, la participaziun a la cultura, l'instrucziun da musica ordaifer la scola e la furmaziun culturala en general.» Quella cumplettaziun duai garantir che il chantun promovia sper las activitads culturalas era la furmaziun culturala. Promover dapli vul la Magistraglia grischuna cunzunt era projects d'intermediaziun.

In ulteriur artigel postulescha la promoziun dad intermediaziun culturala per la giuventetgna. La Magistraglia grischuna vulesc extender quest radius da promoziun era sin ils uffants. Ina funcziun centrala tar la promoziun da projects ed arranschaments duai era la coordinaziun da las differentas purschidas obtegnair.

Previ saja da finanziair la promoziun da projects ed arranschaments entras in budget separà. Apparentamain duai quai succeder cun meds or dal Fond da lottaria. Damai che questas contribuziuns or dal Fond da lottaria n'èn dentant betg destinads per finanziair incumbensas publicas propona la Magistraglia grischuna da finanziair ils pensums d'intermediaziun e coordinaziun culturala cun meds finanzials ordinaris dal chantun.

## Post da coordinaziun scola e cultura

Plinavant vul la Magistraglia grischuna obligar liantamain las regiuns da promover e realisar projects da muntada regiunala e d'installar in'intermediaziun da cultura. Tar l'uffizi da cultura duai vegnir stgaffi in post da coordinaziun «scola e cultura». Per che la collavuraziun tranter cultura e scolaziun funcziunia cun success saja la coordinaziun da las purschidas d'intermediaziun culturala da muntada centrala. E quai tant da vart dals artists sco da vart da las scolas. La purschida actuala «scola e cultura» duai vegnir sviluppada vinavant e cumplettada cun ulteriurs instruments. Intendida vegn ina colliaziun intensiva tranter scola, persunas engaschadas culturalmain ed instituziuns culturalas. Ina tala punt da coordinaziun na saja actualmain betg avant maun. Per garantir ch'il sector d'activitad «Scola e cultura» vegnia nizzegià optimalmain en noss chantun, per sviluppar novas ideas per pussibilitar er a regiuns periferas d'avair art e part da la purschida culturala saja in tal post da coordinaziun sin nivel chantunal indispensabel.

Co in tal program d'intermediaziun culturala possia la finala vesair ora dettia numerusas ideas, scriva la Magistraglia grischuna. Per inspiraziun possian programs d'auter chantuns sco l'idea «cultura mobila» pocurar. I fissia era prudent d'installar en scadina scola ina magistra u in magister interessà sco attaché da cultura. Quel savess organisar annualmain in inscunter cun interessads ed engaschads sin il sector cultural, furmar ina plattafurma d'infurmaziun e da stgomi cultural sin internet che pudess servir sco infurmaziun davart las activitads culturalas da las differentas scolas u schizunt realisar in Festival surregiunal da cultura per giuvenis artists a favur da las scolas grischunas.



Teater giuven grischun sco bun exempel da lavur culturala cun uffants.

FOTO Y. BÜRKL